

Siunnersuut:

Qimmit qimuttut kiisalu qimmeqarneq qitsuuteqarnerlu pillugit Inatsisartut inatsisaata allanngortinneqarnera pillugu Inatsisartut inatsisaat nr. xx, xx 2011-meersoq.

(qimmit aalajangersimasut 13-it aamma qimmit qaasussakkat suanngarsakkallu kiisalu qimmit taakku kinguaavisa eqqunneqartarnerisa, kinguaassiorsinnaanerisa qimmiutigineqartarnerisalu inerteqqutigineqarnissaat)

Saqqummiussissut

(Inuussutissarsiornermut Aatsitassanullu Naalakkersuisoq)

Siullermeerneqarnera

Qimmit aalajangersimasut 13-it aamma qimmit qaasussakkat suanngarsakkallu kiisalu qimmit taakku kinguaavisa eqqunneqartarnerisa, kinguaassiorsinnaanerisa qimmiutigineqartarnerisalu inerteqqutigineqarnissaannik imaqartumik qimmit qimuttut kiisalu qimmeqarneq qitsuuteqarnerlu pillugit Inatsisartut inatsisaata allanngortinneqarnissaanut siunnersuut matumuuna Naalakkersuisut saqqummiuppaat.

Allannguuteqarnissamut siunnersuuteqarnermut tunuliaqutaasoq tassaavoq qimmit qaasussakkat aamma suanngarsakkat inuiaqatigiit toqqissisimallutik inuunissaannut ulorianartutut isigineqarnerat, taamaattumik Naalakkersuisut isumaqarput innuttaasut – pingaartumik meeqqat – qimminut taamaattunut illersorneqarnissaannut piaartumik suliniuteqartoqartariaqartoq.

Qimmit aalajangersimasut 13-it aamma qimmit qaasussakkat suanngarsakkallu kiisalu qimmit taakku kinguaavisa eqqunneqartarnerisa, kinguaassiorsinnaanerisa qimmiutigineqartarnerisalu ajornartorsiutaanerat aamma 2010-mi upernaakkut ataatsimiinnermi oqallisigineqarpoq, taamani qimmit aalajangersimasut taakkulu kinguaavisa Kalaallit Nunaanni inerteqqutaalernissaat pillugu Naalakkersuisut suliniuteqaqqullugit aalajangiiffigisassatut siunnersuut saqqummiunneqarluni. Aalajangiiffigisassatut siunnersuut taanna 2010-mi ukiakkut ataatsimiinnermi aappassaaneerineqarpoq, partiinillu tamanit isumaqataaffigineqarluni.

Sammissaq pillugu maani Inatsisartuni kinguneqartussamik oqallinnissamut qilanaarpunga.

Taamatut Naalakkersuisuniit oqaasissaqarpugut.